

sunt aliæ extrinsecæ, aliæ intrinsecæ. Privativæ sunt infinitum & vacuum. Privativæ vocantur eò, quod earum privativa sit consideratio seu cognitio. Indirectè de iis in Physicis docetur, partim ut melius constet de affectionibus positivis, si ad has privativas conferantur, partim ut falsitas harum affectionum detegatur. Verum cum infinitum ipsis sit, cujus quantitas nullos agnoscit terminos; Vacuum, spatium omni carens corpore; at verò omne corpus seu magnum seu parvum suos habeat terminos, vacuum etiam omne repletum corpore; infinitum in physicis purum putum non-ens est: vacuum verò cerebri vacui & ingenii inanis, ceu loqui amat *B. Sperling. in Instit. suis p. 318.* quem vide sis. Nec quies definitur rectè, quod sit privatio motûs in subjecto ad eum recipiendum idoneo l. 5. Phys. c. 6, cum quies detur, ubi nullus unquam motus adesse debuit, cœli puta & terræ. Quid? quod ea motui non privativè, sed contrariè opponatur, ac fixam & stabilem in eodem loco permanentiam notet.

Tertium.

Affectiones corporis Naturalis de hoc dicuntur reciprocè.

Sunt enim accidentia corporis naturalis propria, hujus naturam insequentia. Unde non tantum in affectionibus unitis inferimus, Omne corpus naturale est quantum, & omne quantum est corpus naturale: Omne corpus naturale est in loco, & quicquid est in loco, illud est corpus naturale, & sic porro; sed etiam in disjunctis, Omne corpus naturale vel motum habet vel quietem, Et, Quicquid non habet motum vel quietem, illud non est corpus naturale. Mensæ verò, scanno, aliisque artificialibus competere cum videntur, *δευτέρως* competunt, non *πρώτως*. Distincta enim est res naturæ à re artis. Rarii verò si quanti dicantur, ipsis attribui nullo modo potest quantitas realis & materialis, sed tantum intentionalis & specialis, quo de alibi.

תהי